

Zena
medievale
e moderna

CENTRO STORICO E CAROGGI

di Enrico Carbone
“RICE”

Venerdì 2 de novembre 2007 a due oe e meza doppo disnâ in via Prè. Tutt'assemme, se sente un fracasso da l'erto e quella poca luxe che se peu vedde fra i teiti a l'è sparia. Unna nuvia de pua ch'a sciorte da-i barcoin de un vegio palazzo a no lascia vedde ninte.

Gh'è staeto un crollo ai ciaen ati do civico n° 14, de proprietæ do Comune de Zena e de 'na societæ privata, dove da-o 1984 no ghe sta ciù nisciun, armeno coscì se credde. I pompè, i cantonè, e guardie, i carbinè han çercòu se pe caxo quarche desgrassiòu o se fise recoviòu pe passaghe a neutte. Manco i caen (*dell'unità cinofila*) han trovòu anima viva. Chi passava pe stradda in quello momento o no l'è staeto colpìo da-i rottammi, ma solamente da a pua grixa; in italian poemmo dî ch'a l'è staeta *un'implosione*.

A questo punto o parroco de San Sisto (a giesa da Bambinn-a dove 'na votta gh'èa, pe Natale, un presepio meccanico che o l'èa 'na maveggia), o parroco dixeiwo co i seu parrocchiaen saieva ben che andessan tutti a-a Madonna da Guardia a portaghe un *ex voto per grazia ricevuta*.

Oa, giustamente ghe saià un'indagine da parte da magistratù.

Ma quanti caxi conscimili ghe son a Zena in quello che ciammemmo pomposamente centro storico? Questo termine o va ben pe San Mattè, Campeito, a Casann-a, Suseia, San Loenso, Banchi, Fossaelo e atri posti de Zena antiga, ma tra 'na casa e l'atra ghe ben ben di fabbricati *fatiscenti* che stan in pè pe scommissa.

